

Gabinete di AVP-FUTURO lo investiga AWSS

GABINETE di AVP-FUTURO a tuma nota di e declaracionnan di e Colegio di Supervision Financiero di Aruba (CAft), cu ta indica cu e empresa estatal Aruba Wastewater Sustainable Solutions (AWSS N.V.) a haci prestamo innecesariamente caro riba e mercado liber. Segun CAft, esaki ta causa cu pais Aruba tin cu paga casi 200 miyon florin di gasto extra y por lo tanto ta innecesario.

E señalamiento di CAft a causa comprendibelmente hopi consternacion y preocupacion den comunidad.

A menciona e mesun suma aki den un conseho cu Gobierno a ricibi recientemente di CAft, den cual CAft ta expresa duda den e manera con AWSS N.V ta maneha su asuntonan financiero. Pa e Gobierno, e hallazgo aki di CAft ta un motibo pa manda haci

un investigacion profundo.

Gobierno ta exige contesta na e pregunta fundamental: riba kico Gabinete Wever-Croes a basa su decision pa scoge pa un construccion cu ta financieramente desfavorabel pa e comunidad.

Gobierno lo evalua ki paso adicional lo tuma basa riba resultado di e investigacion aki.

Ademas Gobierno lo busca conseho tecnico pa mira ki posibilidad tin, den cuadro di bon gobernacion, pa para e prestamo caro haci innecesariamente pa AWSS NV. Adicionalmente, Gobierno lo pidi CAft pa kita e caracter confidencial di e conseho emiti, pa tur hende por haya conocimiento di su contenido.

Pensionadonan ta ricibi atrobe e aumento di 250 florin di reparatietoeslag

Gabinete AVP-Futuro ta tuma paso pa restaura poder di compra pa nos grandinan

GABINETE AVP-Futuro, bao liderato di Prome Minister mr. Mike Eman, ta contento pa por confirma cu fin di e luna aki, e pensionadonan a bolbe ricibi e 250 florin den nan reparatietoeslag. E aumento aki, cu a bin na vigor entrante 30 di april 2025, lo continua di manera structura cada luna como un parti fiho di nan pensioen di AOV.

Prome Minister Eman a expresa su gratitud pa e cantidad di reaccion positivo for di e grupo grandi di esnan cu tin derecho riba e pensioen di AOV.

“Nos adultonan mayor a yuda construi Aruba durante nan bida completo. Nos como pueblo y gobierno tin un obligacion pa trata nan cu dignidad, husto y cu cariño. E aumento aki ta un prome paso pa yuda restaura e poder di compra cu nan a perde durante e ocho añanan tras di lomba.”

E aumento di e reparatietoeslag ta un di e promesanan concreto di Gabinete AVP-Futuro y ta contribui pa mehora e bida diario di miles di pensionado.

Mirando pa dilanti: mas sosten financiero den 2026 y reduccion di e prima di AZV

Minister-President a anuncia cu Gobierno ta trahando riba un ehercicio financiero pa na 2026 por duna un otro aumento significativo di e reparatietoeslag pa AOV'ers cu tin solamente AOV



como fuente di ingreso.

Ademas, e gobierno ta den dialogo cu SVB (Banco di Seguro Social) y AZV (Seguro General di Gasto Medico) pa baha e prima di 5% pa e pensionadonan. Pensionadonan sin dunado di trabao ta pagando e prima aki nan mes, loke ta representa un peso grandi pa nan.

Gobierno ta analisando si ta posibel pa elimina e prima aki completamente of reduci esaki considerablemente pa e pensionadonan cu un entrada anual bao di 30.000 florin.

“Un sociedad husto su progreso no ta ser midi solamente riba cifranan economico, sino mas bien riba manera cu e ta trata su adultonan mayor. Nan merece tranquilidad, respet y seguridad financiero,” segun Prome Minister Eman.